



Z'Basel an mym Rhy

Es deent sit Joore und vyyle Daage,
im Kindsge, an Schuele kasch s uffsaage!
Z'Basel gheert s doorum halt aifach drzue,
kasch ämmel au grad mitsumme – voorzue!

*Z'Basel an mym Rhy,
Jo, deert mecht i syy!
Weiht nit d'Luft so mild und lau,
Und dr Himmel isch so blau.¹*

Dr Glaibasler Eeredaag darfsch nit versuume,
drey Figure dien als uf em Rhy abruume.
As Basler kennsch gwiss au s näggschti Lied,
drum kasch grad mitsinge nonig mied?!

*Was klepft? E Schuss! Was mag das syy?
Deert danzt jo aine uff em Rhy.
E Dannebaimli schwingt äär,
und ains, zwai, drey verdringgt äär.²*

An dr Fasnacht goots iber zwai Brugge,
und am Cortége gits vyyl Stau und Lugge.
Um vor em Comité kenne z bestoo,
mien mir drum vier Pünggt basiere dmoo.

Mir faare mit dr Chaise - noonig läär,
und seen aini vo vier Fääri wyt häär,
do fallt is yy e scheeni Melodie,
dien is grad schwäälgelöset in Nostalgie!

*Fäärimaa, Fäärimaa,
wo das Schiffli stiire ka,
quer y bi Sunneschyyn dr Rhy
bim e feine Gleesli Wyy.³*

Zem Apero biege mir yy,
zer Bromenaade grad am Rhy,
und wysawyy kasch s scho gsee,
s Maartisleggli lütet amme mee.

*Es git vyyl duusig Gleggli uff dr Wält,
kling klang, kling klang.
Doch findsch nit ains, ass wie s Maartisleggli schällt,
kling klang, kling klang.
Aimool im Joor, do bimbelets ganz scharf,
wills an däm grosse Daag d Basler Mäss ylytete daarf,
denn weiss s ganz gnau, s ka nit scheener syy -
denn hets e Stolz uff Basel an sym Rhy.⁴*

Ob Lääbensoodere vo dr Stadt,
ooder Toor zem Meer – wo s Land isch blatt,
äär biglaitet is allewyyl,
Facette het äär drum ganz vyyl.

Konzäart kasch miterlääbe uff em Flooss,
e glatti Sach, uff em Fluss isch was loos,
Buvette laade yy entlang dr Bromenaade,
e wunderscheen Ambiente under Arkaade!

E groosse Eerger aaber isch s Littering,
und unschinierte Saiche e gruusig Unding,
an Bruggepfyyler und alte Muure,
iiberaal stinggts, s isch zem versuure!

Im Summer, no isch s Wasser frisch,
gosch go baade mit em Wiggelfisch.
Do fallt is yy, mien no ain bringe,
drum feen mir au grad aa mit singe!

*Basler Ryywiera
Mykonos isch zwaiti Waal,
Las Palmas ka me glatt vergässe,
und Rimini schmegggt faad und schaal.⁵*

Biglaite duet äär is Joor uus, Joor yy,
mer reede vo unserem giebte Rhy,
syt Jorhunderte brägt äär unser Bild,
fliesst määngmool ruug, määngmool wild!
Z'Basel an mym Rhy,
Jo, deert mecht i syy!

Faasnacht 2018, Chaise Wundergiggli

wundergiggli@bluewin.ch

<http://wundergiggli.jimdo.com>

<http://tinyurl.com/q43nawz>

https://www.facebook.com/Wundergiggli/photos_stream?tab=photos_albums

Druck: Thoma AG, Basel

Quellen / Texte

1. Johann Peter Hebel

2. Anna Keller

3. Str Francis

4. Basler Elschtere

5. Dief Flieger